

卷百十二 鄂

州 江夏 崇陽

武昌 永安

蒲圻

嘉魚

卷百二十一 涪

州 涪陵

賓化

武龍

樂温

卷百二十一 夷

州 黔陽 信水 綏陽

黔江 都濡

洪杜 義泉

洋水 洋川

宜夷

播

州 涪 遵義

帶水

芙蓉

卷百二十二 思

州 務川 多田 思州

扶陽 思王

南

南

扶攸

西

州 夜郎 蔡德

鹿泉

州

三

扶攸

牂

州 新建 新寧 賓化

莊

州 石牛 南陽

水

多樂 樂安 石城

瑛

州 武安 望仁 應江

玩

州 龍標 充

州 梓潼 底水

思王 思渝

業

州 始安 涪溪

梓董

州

州

卷百二十三 揚

州 江都 廣陵

州

州

卷百二十四 和

州 鹽池 鹽城

楚

州 山陽

淮陰

寶應 鹽城



太平寰宇記卷之一百二十二

江南西道十

鄂州

鄂州

江夏郡今理江夏縣

禹貢江漢朝宗于海按今江漢二水

會于州之西界春秋時謂夏汭乃楚地傳謂吳伐

楚沈尹射奔命于夏汭又世本云楚子熊渠封中

子紅于鄂今武昌縣地也至戰國末猶屬楚秦并

天下為南郡地按晉地理志云漢高祖初分南郡

置江夏郡漢志應劭注云沔水自江別至南郡華

容為夏水過郡入江故曰江夏今州即江夏郡之

鄂州



沙羨縣地後漢因之後劉表以黃祖爲江夏太守  
又江夏記云一名夏口亦名魯口按三國志吳主  
破黃祖于沙羨取其地爲都遂改名武昌又武昌  
記云大帝築城于江夏山爲江夏城卽今郡以程  
普爲江夏太守督夏口遂欲都鄂改爲武昌其民  
謠曰寧飲建業水不食武昌魚寧歸建業死不向  
武昌居繇是徙都建業此爲郡如故其後亦爲重  
鎮及西晉伐吳使王戎襲武昌胡奮襲夏口是歷  
古爲兵衝之地至義熙元年冠軍將軍劉毅以爲  
夏口二州之中地居形要控接湘川邊帶漢沔請

荊州刺史劉道規鎮之至六年自臨鄣徙江夏郡  
於夏口乃割荆湘江三州之地于此立爲郢州故  
宋書云孝武帝嫌上游強盛遂以竟陵安陸江夏  
武陵巴陵武昌西陽齊安等八郡置郢州則江夏  
爲郢州之地至順帝時荊州刺史沈攸之起兵素  
蓄士馬資用豐積戰士十萬鐵馬二千軍至郢州  
府功曹臧寅以爲攻守勢異非旬日所拔若不能  
時舉挫銳損威今順流長驅計日可捷旣傾根本  
則郢城豈能自固攸之不從郢州刺史柳世隆拒  
守攸之盡銳攻之不尅眾離沮遂潰散故齊書列



傳云劉懷珍言于高帝曰夏口兵衝要地宜得其人遂令柳世隆鎮焉其後梁武起兵襄陽東下攻圍二百餘日方降因分置北新州尋分北新州爲士富洄泉豪五州梁末北齊得之遣慕容儼守之爲陳將侯瑱攻圍凡二百日不下後因二國通和乃復歸陳隋平陳改爲鄂州取鄂渚以爲州名煬帝初州廢復爲江夏郡唐武德四年平蕭銑復置鄂州天寶元年改爲江夏郡乾元元年復爲鄂州永泰之後置鄂岳觀察使以鄂州爲治所皇朝爲武清軍節度

元領縣九

今六

江夏

武昌

蒲圻

嘉魚

崇陽

永安

三縣割出

永興

置興國軍

通山

入興國軍

大冶

全上

州境

東西九百三十九里

南北三百八十八里

四至八到

北至東京一千四百一十里

北至西京一千五百三十里

西北至長安三千三百三十里



東至江州六百里

南至岳州七百里

西至漢陽渡二里

北至黃州二百八十五里

東南至洪州水陸相兼一千九百三十八里

西北至沔州北界漢江四里

西南至沔州界七里

東北至蘄州五百里

戶

唐開元戶二萬九千七百

皇朝戶主一萬四百七十客一萬五千一十四

風俗

火耕水耨人食魚稻以漁獵伐山為業羸蛤食物常足人偷生朝夕取給而無積聚重巫鬼之祀

姓氏

江夏郡三姓 黃 喻 潘

人物

鬻子 名熊為文王師 孟宗 字恭武江夏人至孝冬日母

吳司 孟陋 字少孤武昌人宗曾孫位 孟嘉 字萬

曾孫庾亮 郭翻 字長翔武昌人隱居臨川 唐李鄘 江夏人

孟嘉江夏人侍樽溫宴龍山風吹帽墮



節度詔入拜相 **李善** 字次璠江夏人淹貫今古注文選 **李邕** 字太和以文章  
詞翰名一世 官北海太守

土產

銀 麻 紵布 秀柑 火紙 茶 茶譜云鄂州之東山蒲圻

唐年縣大口黑色如韭葉極軟治頭疼

江夏縣 舊十鄉今十五鄉 漢沙羨 音怡縣地漢書地理志沙羨

縣屬江夏郡自漢至晉猶為沙羨縣地晉太康元年改為沙陽按沙陽今蒲圻縣界魚嶽山東南沙陽故城是也東晉汝南郡流人寓于夏口因僑立汝南郡又為汝南縣焉晉末改為江夏縣按應仲

遠注水經云夏水入江是為江夏江夏地記云涓水西四十里漢川界安州故城古江夏郡也據輿地志云郡有沙羨縣吳時置督將于魯山口吳記云孫權擒江夏太守黃祖於沙羨以程普為江夏太守晉宋竝為江夏郡齊因之亦名重鎮隋平陳後置鄂州治於此以江夏郡為縣居舊汝南縣界荆湘記云金水北岸有汝南舊城是也隋開皇十年使人韋焜就州東南焦度樓下置大業十三年州賊董道冲陷沒其縣遂廢洎唐武德四年又權置縣宇貞觀三年移于城南平地置又縣圖云縣



元一十八鄉于大厯二年分金城豐樂宣化等三鄉置永安場今十五鄉存焉 金城山在縣東南二百三里下有村在金口水南村人堰水成塘以此爲名 軻山在縣東南二百七十三里山形圓曲有如車軻 鈷鉞山在縣東南一百一十七里山形似鈷鉞 靜山在縣東南一百一十里其山迴聳曲澗清流茂林高峻可以息諸仁智故名靜山 驚磯山在縣東九十里西南俯臨大江下有石磯波濤迅急商旅驚駭故以爲名 白頭山在縣東南七十里上有四石俱白故曰白頭山 江

夏山在縣東南有小山迤邐東入武昌界西去縣六十里其山重疊本名峽山天寶六年改爲江夏山 金華山在縣東南五十里其山土石紅赤因名 冶唐山在縣東南二十六里舊記云先是晉宋之時依山置冶故以爲名 黃鶴山在縣東九里其山斷絕耆舊傳云昔有仙人控黃鶴從天而夜響 雞翅山在縣南八十里昔有金雞飛集此山 金水在縣南九十里出秦山西注入大江舊記云有金雞從雞翅山南飛產金于此故名金水 鄂渚輿地志云雲夢之南是爲鄂渚 曲池水



太平寰宇記卷之一百一十二  
在縣東三里梁太清四年邵陵王蕭綸爲富水郡  
太守雅好賓客樂于詩酒每慕王右軍蘭亭流觴  
曲水之興故以效之 鸚鵡洲在大江東縣西南  
二里西過此洲從北頭七十步大江中流與漢陽  
縣分界後漢書云黃祖爲江夏太守時黃祖長子  
射大會賓客有獻鸚鵡于此洲故爲名又荊州記  
云江夏郡城西臨江有黃鶴磯又有鸚鵡洲侯景  
令宋子仙夜襲江夏藏船于鸚鵡之洲 南浦在  
縣南三里離騷云送美人兮南浦其源出景首山  
西入江春冬涸竭秋夏泛漲商旅往來皆于浦停

泊以其在郭之南故曰南浦 黃鶴樓在縣西二  
百八十步昔費禕登仙每乘黃鶴於此憇駕故號  
爲黃鶴樓唐崔顥有登黃鶴樓詩云昔人已乘白  
雲去此地空餘黃鶴樓黃鶴一去不復返白雲千  
載空悠悠晴川歷歷漢陽樹芳草萋萋鸚鵡洲日  
暮鄉關何處是煙波江上使人愁 焦明本祠晉  
列將自後致仕尋醫行至鸚鵡洲結茆而止唐建  
中四年李希烈反城下交戰神力衛助軍城得康  
觀察使李謙奏聞貞元四年封爲城隍王廟號萬  
勝鎮安王 蔣帝祠金陵蔣山神也 宋無忌祠



初州多有火災占之曰東南聖水坡宋無忌遺跡  
觀察使牛僧儒立廟祀之 邵陵王廟自梁朝之  
時邵陵王捨宅爲寺因之立廟 白馬廟耆舊相  
傳云蜀時張飛之靈也 橫江廟卽吳將魯肅也  
丁固宅母作大被以招賢故學爲時高後母疾  
思筍泣竹冬月筍生

武昌縣

東一百七十里  
舊七鄉今九鄉

舊名東鄂系本云楚子熊渠

封中子紅于鄂漢爲鄂縣又江夏記云漢高祖析  
南郡置江夏郡處于鄂是武帝封鄂長公主之邑  
也漢書地理志云屬江夏郡又吳志云甘露初析

江夏置武昌郡大帝嘗都之晉宋不改然扼上流  
者或治武昌悉以名臣皆爲重鎮宋又置郢州領  
江夏武昌竟陵安陸西陽齊安八郡後改郢州移  
理江夏武昌復爲鄂州之東境矣武德中建鄂州  
領縣五而武昌江夏實其最焉續搜神記晉孝武  
世宣城人秦精嘗入武昌山中採茗遇一毛人長  
丈餘引精至山曲示以叢茗而後去俄而復還乃  
探懷中橘遺精精怖負茗而歸 樊山在州西一  
百七十二里出紫石英山東十步有岡岡下有寒  
溪溪中有蟠龍石謝玄暉詩云樊山開廣宴是也



又千寶搜神記云若天大旱以火燒山即致大雨  
今往往有驗 西塞山按江夏風俗記云高一百  
里在州西水路二百九十二里峻嶒橫江袁宏東  
征賦云沿西塞之峻嶒又江表傳云劉勳敗于彭  
澤走入楚江聞皖已沒遂投西塞 白雉山在縣  
西北二百三十五里山高一百二十五丈其山有  
芙蓉峯前有獅子嶺後有金雞石南出銅鈔自晉  
宋梁陳以來置爐烹煉 鳳栖山在州西北二百  
二十五里吳建興年鳳凰降此山因以爲名山有  
石鼓鳴則雨降 神人山在州西水路一百八十

一里歷代帝紀云吳建衡二年有神人乘白鹿從  
此山出 郊壇岡在縣東南輿地志云吳帝郊壇  
黃龍元年即位于此武昌記云安樂宮八里有南  
郊壇是也 吳造峴在州西一百七十一里輿地  
志云孫權于樊口被風破船鑿樊嶺而歸因以爲  
名 五丈湖在縣東有長湖通江南冬即乾涸陶  
侃作塘以遏水於是水不竭因取琅邪攝湖魚菱  
置湖內其菱異于他處有鯽魚長三尺永嘉年初  
頽破太守褚雋之重修復 敗橋湖在縣西秋夏  
水深一丈餘凡春冬即涸昔吳主於此造橋遊獵



其後橋敗因以爲名 浮石湖闊七十里在州西  
一百八十五里春冬乾涸中有一石獨立周迴二  
十步形狀極下縱水泛漲而不能沒 盤龍石在  
州西一百七十五里周迴七十餘丈冬出夏沒曾  
有盤龍于此 節度石在州西一百八十四里其  
石在江中輿地志云節度石西陵與武昌分界之  
處 江右水經注云江之右岸北對崢嶸洲冠軍  
劉毅破桓玄處 釣臺武昌池下有石折臨江懸  
峙四眺極目武昌記釣臺在城南 崢嶸洲在縣  
西卽晉時劉毅破桓玄處 寒溪浦在縣西二里

樊山下有寒溪盛暑之月嘗有寒氣 敗舶灣在  
縣西北水路七里吳志云孫權於武昌新裝大船  
試泛之時風大盛權欲取灘州谷利拔刀向船工  
曰不取樊口者斬工卽轉舵入樊口風遂猛不可  
行乃還武昌記權與羣臣泛船中流值風至樊口  
十里餘便敗因名敗舶灣 灘州水路去州一百  
九十三里輿地志云伍子胥叛楚出關于江上見  
漁父求渡時旁多人漁父歌曰灼灼兮侵已私與  
子期兮蘆之漪子胥旣渡解百金之劍與漁父漁  
父曰楚購子粟五萬爵執圭豈百金之劍乎子胥



行未數步回顧漁父已覆舟而死其處是也樊  
港源出青溪山三百里至大港闊三十丈水曲竝  
在縣內界又吳志云谷利拔劍擬舵工急趨樊口  
卽其處也安樂宮在州西北水路二百四十里  
吳黃武二年築宮于此赤烏十三年取武昌縣材  
瓦繕修建業因遂停廢南郊壇在州西北百八  
十里在縣南吳主孫權黃龍三年郊天之處吳  
大帝城在州西百八十里魏黃初三年吳主置城  
有五門各以所向爲名西角一門謂之流津北臨  
大江又晉中興書云陶侃領江州刺史鎮武昌課  
種柳都尉夏施夜盜拔郡西門柳爲己所種侃後  
因駐車施門問此是郡西門柳何以盜種施怖謝  
罪時人憚之其城黃龍元年遷都建業因此停廢  
鄂王城在州西北百八十里楚子熊渠封中子  
紅于鄂僭稱王居此城九州記曰今武昌是也九  
州記畧同今鄂人事鄂王神卽遺像也黃石城在  
州西北二百九十里江表傳云劉勳敗于彭澤走  
入楚江從尋陽步上聞皖已沒及西塞將兵救皖  
爲孫權所破遂奔曹公卽此城也廢城塘縣在  
州西北百十里隋末縣令羲士暄置西有小城塘



以為名大業九年廢 故鄂縣城在州西北百八十三里輿地志云漢舊鄂縣屬江夏吳之武昌晉太康年復立鄂州此縣廢矣 陶侃廟在州東一百七十五里侃薨于樊口百姓思焉咸康五年立廟祀之有碑在又至興元年中縣令唐平以其荒涼無庇遷在縣西北一百步俯臨大江 樊姥廟在州西北百七十二里武昌記云孫權嘗獵于樊口山見一姥問獵何物荅曰得一豹姥曰何不豎其尾言訖不見權於後立廟祀之 庾雲墓西北去州一百八十五里是晉征西將軍祠 桓宣武墓西去州一百八十里大司馬揚州牧桓元子也 戴淵墓西北去州一百九十六里晉右光祿大夫開府儀同三司謚簡侯字若思

蒲圻縣 西南四百一十里 舊五鄉今四鄉 漢沙羨縣之地地理志江夏郡有沙羨縣又吳黃武二年於沙羨縣置蒲圻縣在競江口屬長沙郡因湖以稱故曰蒲圻盛弘之荊州記云長沙郡有蒲圻縣宋元嘉七年屬巴陵郡孝建元年屬江夏大同五年於巴陵郡下雋立樂化縣還屬上雋郡陳又改上雋郡為雋州天

嘉元年還復本名其沙陽縣本名沙羨晉安帝改



為沙陽縣仍舊屬上雋梁承聖三年改為沙州陳  
初復還縣又屬上雋隋開皇元年使人韋焜省上  
雋郡又立樂化縣廢沙陽入蒲圻始屬鄂州開皇  
十二年使人牛强又省樂化縣併入蒲圻其年洪  
水泛溢縣遂漂流就鮑口權時初立大業十三年  
董道冲為亂蕭銑敗之武德四年使人王宏讓刺  
史周和舉權在陸溪川中為縣貞觀七年移還鮑  
口天祐之後析鮎瀆鎮下界鄉里為嘉魚縣 赤  
壁在縣西北一百五十里江岸北即曹操為周瑜  
所敗之處 太平城在縣西南八十八里即吳孫

權遣魯肅征零陵于此築城

嘉魚縣

西南四百六十五里舊一鄉今二鄉

本蒲圻縣隋之鮎瀆鎮以

多生鮎魚為鎮名唐天寶三年本道以鎮界所管

懷仁宣化三里合為一鄉屬鎮徵科偽唐界為嘉

魚縣 魚嶽山去舊縣一百二十里按荊州記蒲

圻縣下流有魚嶽小山孤峙于中洲近在江南

蒲圻湖東北沿流去州三百里在蒲圻縣西北一

百五里舊云多生蒲草吳大帝初置蒲圻縣在北

湖側故以為名屬鮎瀆鎮 呂蒙城東北沿流去

州三百九十三里在蒲圻縣西北即呂蒙所築屯



兵于此地屬鮎瀆鎮 呂蒙墓江夏記云蒲圻縣南對陸路漢口一名刀鑲山沂流八十里有呂蒙城城中有蒙墓孫權使陸遜拒劉備于西陵權屯陸溪口爲眾軍節度是此也

崇陽縣

西南六百二十里今九峯鄉

古下雋縣漢地理志屬長沙國

宋元嘉七年入岳州梁大同五年於下雋縣置上雋郡乃分爲樂化縣至承聖三年改爲雋州陳天嘉四年州廢洎隋開皇九年廢州省樂化下雋兩縣入蒲圻唐天寶元年江西採訪使奏以蒲圻梓洞中二千餘戶去縣六百餘里若不別置縣則難以統攝二年勅于其洞桃花溪口置唐年縣僞吳順義七年改爲崇陽僞唐改爲唐年皇朝改爲崇陽其地唐末已屬淮南楊行密割據改爲崇陽縣梁于郡國志上存其空名改爲臨夏縣後唐同光初復舊晉天福初改爲臨江縣 壺頭山在縣東北水路六十里其山幽谷深邃山下有溪穿入山中名桃花洞水入溪合流山名壺頭山水名壺頭灘三里皆平石石脈流水纔通小舟若水泛漲卽方可濟行旅憚之後漢馬援征五溪至下雋沒于壺頭之灘卽其處也川如鬢壺之口以爲名 弩



牙山在縣南四十里有吳城港水繞巖下過其巖  
勢如弩牙 雲溪山在縣西二百二十里山之峭  
峻中有清流界道如帶尚書曰至于敷淺原卽此  
處也 九嶺山在縣西南二百里九山連接  
伏波祠在壺頭山下在縣東北五十里舊圖經云  
漢伏波將軍馬援征五溪軍次下雋頓壺頭之灘  
時暑熱將士多死援遇病遂穿岸爲室歿于此岸  
之室室猶在因此立祠 溫湯在龍頭山岸可以  
愈疾

永安縣

西南三百里元三鄉

本江夏縣之界南去舊縣三百里

徵發調賦動經浹唐大厯二年割金城豐樂宣  
化等鄉置鎮僞吳乾貞三年改爲永安場僞唐保  
大十二年昇爲縣 鍾臺山在縣東南一百里上  
有桃花洞卽李邕讀書之所石室見存上有石臺  
臺上有石鍾或時自鳴遠近皆聞 牛鼻山在縣  
東八十里有深潭一百丈四面青蘿綠竹可觀山  
形似牛鼻也

校勘

寰宇記卷一百一十二

鄂州

總序

故宋書云孝武帝嫌上游強盛遂以竟陵安



太平寰宇記卷之一百一十二  
陸江夏武陵巴陵武昌西陽齊安等八郡置  
郢州

以宋書州郡志前後所載考之孝武孝建  
元年分荊州之江夏竟陵隨武陵天門湘  
州之巴陵江州之武昌豫州之西陽又分  
江夏爲安陸立郢州凡九郡天門後還荆  
州隨及安陸後還司州故但領郡六今記  
脫天門隨兩郡增齊安一郡爲八郡此略  
據元和郡縣志總數而言耳按齊安南齊  
分西陽所置見黃州序不應誤出於此下

武昌縣敘所載尤爲舛略

宋本止

太平寰宇記卷之一百一十二終

太平寰宇記

卷之一百一十二

六



太平寰宇記卷之一百二十一

江南西道十八

涪州

黔州

涪州

涪州

涪陵郡今涪陵縣

禹貢梁州之域周省梁又為雍州之

域春秋時屬巴國秦為巴郡地漢為涪陵縣地漢

末為赤甲兵所聚故此有赤甲戍存焉後漢亦然

至蜀先主以地控涪江之源故於此立涪陵郡領

漢平漢葭二縣按蜀志劉威石為涪陵太守即此

地又四夷縣道記云故城在蜀江之南涪江之西



其涪江南自黔中來由城之西沂蜀江十五里有  
鷄鳴峽上有枳城卽漢枳縣也李雄據蜀後荒廢  
東晉桓元子定蜀別立枳縣于今郡東北一十里  
鄰溪口又置故枳城郡尋廢周武保定四年涪陵  
首領田思鶴歸化于故枳城又立涪陵鎮開皇三  
年移漢平縣于鎮城仍改漢平縣爲涪陵縣因鎮  
爲名以隸渝州大業三年又罷渝州爲巴郡以涪  
陵之地又爲鎮焉唐武德元年鎮復爲涪州天寶  
初爲涪陵郡乾元元年又爲州元和三年七月勅  
涪州可隸黔中道以涪州疆理與黔州接近故也

至大中初又隸荆南道地理遙遠甚不便尋復隸  
黔中按華陽國志云涪陵巴之南鄙從枳縣入沂  
涪水秦將司馬錯由之取楚黔中地漢興恆爲都  
尉理山嶮水灘人多獾蝥唯出丹漆枳縣卽今涪  
州所理是獻帝建安中涪陵謝本以涪陵廣大白  
州牧劉璋分理丹興漢葭二縣以爲郡璋乃分涪  
陵立永寧兼丹興漢葭合四縣置屬國都尉理涪  
陵蜀先主改爲涪陵郡改永寧曰萬寧又增立漢  
復縣後主又立漢平縣晉太康地記省丹興縣郡  
移理漢復領漢葭涪陵漢平萬寧等五縣又言萬



大平寰宇記 卷之一百二十七  
寧在郡南水道九百里其萬寧蓋今費州是蜀後  
主延熙中涪陵大姓徐巨叛使將軍鄧芝討平之  
漢涪陵蓋在今涪州東南三百三十里黔州是其  
故理又言漢葭在郡東百里澧源出縣界蓋今州  
東九十里故黔州城是其省丹興縣蓋在今黔州  
東二百里黔江縣是張孟陽云丹興漢葭二縣並  
出丹砂今按漢平縣蓋在今涪州東百二十里羅  
浮山之北岷江之南白水入江處側近又按十三  
州志云枳在郡東按今黔州亦與巴郡東南相抵  
據謝本所論晉志所志今夷費思播及黔南等五

州悉是涪陵故地又隋圖經集記及貞觀地志云  
黔中是武陵郡酉陽地按漢酉陽在今溪州大鄉  
界與黔州約相去千餘里今之三亭縣西北九百  
餘里別有酉陽城乃劉蜀所置非漢之酉陽事已  
具武陵郡隋圖經及貞觀地志並言劉蜀所置酉  
陽爲漢酉陽蓋誤認漢涪陵之地也自永嘉之後  
沒于夷獠元魏之後圖記不傳至宇文周保定四  
年涪陵首領田思鶴歸化初于其地立奉州續又  
改爲黔州大業中又改爲黔安郡因周隋州郡之  
名遂與秦漢黔中郡交互難辯其秦黔中郡所理



在今辰州西二十里黔中故郡城是漢改黔中爲武陵郡移理義陵卽今辰州敘浦縣是後漢移理臨沅卽今朗州所理是也今辰錦敘獎溪澧朗施八州卽秦漢黔中郡之地與今黔中及夷費思播隔越峻嶺東有沅江水及諸溪並合而東注洞庭湖嶺西有巴江水一名涪陵江自牂柯北歷播費思黔等州北注岷江以山川言之巴陵之涪陵與黔中故地炳然自分矣

領縣四

涪陵

賓化

武龍

樂溫

州境

東西六百九十里

南北九百一十里

四至八到

東至東京歸峽路三千四百五十七里

東取江陵府路至西京三千六百五里

東取江陵府路至長安水陸路相兼三千三百二

十五里

東至萬州水路六百一十里自萬州取開州通州

宣漢縣及洋州路至長安二千二百四十里

東至忠州三百五十里



南至黔州水路三百四十里

西至渝州四百六十里水路三百四十里

北至忠州三百九十六里

東南至黔州四百九十里

西北至渠州鄰山縣二百七十里

東北至忠州三十里

東至江陵府水路一千七百七十里

戶

唐開元戶一千六百

皇朝戶主三千五百一客八千五百四十七

風俗同黔州

人物無

土產

連頭獠布 金 文鐵 席 段氏蜀記云涪州

出扇為時貴之

涪陵縣

五鄉

漢舊縣屬巴郡蜀立郡於此隋廢郡屬渝

州唐朝又于此立郡 羅浮山連互入南海名山

記云昔羅浮仙人居此山故名之 石門周地圖

記云涪陵均堤東十三里有石門門東有石鼓清

臺扣之聲遠 銅柱灘周地圖記云涪陵江中有



銅柱灘昔人於此維舟見水底有銅柱故名爲銅柱灘灘最峻急一云馬援鑄柱于此錦繡洲周地圖記云銅柱灘東有錦繡洲巴士盛以此洲人能織錦罽故以名之橫石灘在郡北後漢岑彭破公孫述將侯丹於黃石卽此今謂之橫石灘

賓化縣

西南三百里元五鄉

本秦爲枳縣地後漢爲巴縣地周

明帝武成三年省桓元子所置枳縣入巴縣唐貞觀十一年分渝州巴縣之地北置隆化縣以縣西二十里永隆山爲名先天初以諱改爲賓化縣按新圖經云此縣民並是夷獠露頂跣足不識州縣

不會文法與諸縣戶口不同不務蠶桑以茶蠟供輸寡婦清臺俗名貞女山史記云寡婦清臺先得丹穴而擅其利家富不貲清能守其業用財自衛秦皇以爲貞婦而爲築女清臺湖陽溪在縣側水西流入渝州南平縣界

武龍縣

東南二百五十里舊五鄉今四鄉

漢涪陵枳二縣地唐武德

元年分涪陵立縣以邑界武龍山爲名內江一名涪陵江一名巴江在縣南屈曲北流水自黔州信寧縣界入李膺益州記云內江水自萬寧西北二百八十里至關頭灘灘長百步懸崖倒水舟楫



莫通 蜀江門灘在縣前巴江水中

樂溫縣

西北一百一十里 舊六鄉今四鄉

秦枳縣地後周武成三年

省桓元子所置枳縣入巴縣此又為巴縣之地唐武德三年又析渝州巴縣地置以縣南樂溫山為名初置屬南潯州九年方改屬涪州縣地頗產荔枝其味尤勝諸嶺 樂溫山在縣南四十八里 溶溪水源出縣理北南流經縣東又南至廢永安縣東北二里注大江 永安故城武德元年析涪陵巴二縣地于今州西南一百五十里置以縣北永安山為名開元二年民以為非便遂廢

### 黔州

黔州

黔中郡今理彭水縣

歷古蠻夷之地禹貢荊州之域左傳

庸人率羣蠻叛楚即其地戰國時楚黔中地秦惠王欲楚之黔中地以武關外易之即此土也至昭王伐楚得其地因置黔中郡於今辰州是故漢書通謂五溪之地在漢為武陵郡之西陽縣地武帝於此置涪陵縣按賈耽四夷述武陵五溪蠻之西界也後漢獻帝時分為四縣屬國都尉理三國屬蜀先主又增一縣按蜀志云先主於五溪立黔安郡領五縣至後主又增置一縣晉平吳後省一縣



猶領五縣永嘉後地沒蠻夷經二百五十六年吳  
 錄云黔陽屬武陵郡今辰州三亭縣西黔陽故城  
 卽漢之黔陽縣城也又黃閩武陵記云武陵郡境  
 四千餘里卽知黔中亦其土也荆州圖副云巴東  
 南浦縣與黔陽分界南浦今屬萬州縣是也後周  
 保定四年蠻帥田思鶴以地內附因置奉州建德  
 三年改爲黔州至隋初如之大業三年又改爲黔  
 安郡領彭水涪川二縣唐武德元年又改置黔州  
 領彭水都上石城三縣二年又分置盈隆洪杜相  
 永萬資四縣於州置都督府督務施業辰智牂充  
 應莊九州其年自今州東九十里故州城移於涪  
 陵江東彭水東以相永萬資二縣屬費州以都上  
 一縣分置夷州十年又以思州高富縣來屬十一  
 年又以高富屬夷州以智州信寧來屬督思辰施  
 牢費夷巫應播充莊牂珍池矩十五州黔州領彭  
 水石城盈隆洪杜信寧五縣聖厯元年罷都督府  
 以莊州爲都督府景龍四年又罷莊州都督以播  
 州爲都督府先天二年罷播州都督府復以黔州  
 爲都督府開元二十六年又於黔中置採訪處置  
 使以都督可朱渾城爲使又隸五溪諸州入黔中



道仍加置經畧使天寶元年改黔州爲黔中郡依  
舊都督施夷播思費珍溱商九州又領充明勞義  
福捷邦珍清莊峩蠻牂鼓儒琳鸞令邠暉郝總敦  
候晃柯樊稜添普寧功亮茂龍延訓卿雙整懸撫  
水矩思源逸殷南平勳姜龔等五十州皆羈縻寄  
治山谷乾元元年復以黔中郡爲黔州都督府自  
大順元年改爲武泰軍節度天復三年之後僞蜀  
割據移黔南就涪州爲行府以道路僻遠就便近  
也皇朝因之不改至太平興國三年因延火燒蕪  
公署五年卻歸黔州置理所仍轄黔內思南費溱

夷播六州只從黔州差衙前職員權知按唐貞元  
十道圖云黔涪夷費思播溱珍南等九州自分十  
道屬江南道其涪州開元中改屬山南道天寶中  
復屬江南道乾元中又屬山南東道古九州界本  
漢巴郡之南鄙雖在大江之南而東與施溪錦獎  
四州隔一高嶺其南溱珍等三州又與劍南瀘州  
接境風俗頗同以山川言之合屬劍南道

領縣六

彭水 黔江 洪杜 洋水 信寧 都濡

州境



東西一千一百四里 南北八百三十里

四至八到

西北至東京三千八百六十五里

西北至長安三千六百五十里取萬州路二千五百七十里

西北至西京三千四百四十五里

東至澧州一千五百六十四里

南至夷州六百里

西至涪州五百五十里

北渡江山路至忠州六百里

東南至思州三百里

西南至播州八百里

西北水路至涪州武龍縣二百七十里

東北至施州七百四十里

戶

唐開元戶四千二百

皇朝戶主一千二百七十九客二千五百四

風俗

雜居溪洞多是蠻獠其性獷悍其風淫祀禮法之道故不知之開寶四年黔南上言江心有石魚見



上有古記云廣德元年二月大江水退石魚見部  
民相傳豐稔之兆

人物 無

土產

麩金 水銀 朱砂 藥書謂辰  
錦丹砂 黃蠟 鹿麻布

竹布 紵布

彭水縣

舊三鄉  
今二鄉

本漢西陽縣地屬武陵郡吳分西陽

之境置黔陽郡地即屬焉又縣道四夷述云蓋劉  
璋分涪陵置漢葭縣地開皇十三年蠻帥內屬於  
此地置彭水縣屬黔州大業三年罷州爲黔安郡

縣仍舊焉貞觀四年與州移于今理有鹽井一在

縣東九十里今煎 伏牛山在縣東一百里山左

右有鹽泉州人現置竈煮以充軍用 壺頭山山

形似壺馬援曾戰於此 三嵎山鄧芝曾此大戰

更始水又名涪陵今名內江水水經注云更始

水即延江文津也言水下入涪陵別名涪陵水

涪陵水一名內江水在州西五十步西北注涪州

入蜀江 可通水源出黔江縣界武陵山西流百

餘里經州理北注內江水 彭水按九州要記云

黔州有彭水在侯寧縣即古之黔中地 朗溪漢



縣名其地有朗山山有野狼兩眼在背上能餐諸  
獸 五溪謂酉辰巫武沅等五溪古老相傳云楚  
子滅巴巴子兄弟五人流入五溪各爲一溪之長  
一說五溪蠻皆盤瓠子孫自爲統長故有五溪之  
號焉古謂之蠻蠻聚落

黔江縣

東三百里  
元三鄉

隋開皇五年置石城縣屬庸州大

業二年廢以地入彭水縣唐武德元年再置移就  
無慈城貞觀四年又移于今所天寶元年改爲黔  
江縣 羽人山一名神仙山在縣東四百三十里  
山頂與澧州分界 阿蓬水一名太平水東北自  
施州清江縣界東西南流經縣北一里又南入洪  
杜縣界 仙掌在縣東二里崖面上指掌如畫土  
人傳爲仙掌

洪杜縣

東南一百三  
十里元一鄉

唐武德二年析彭水石城之地

于今縣北八十里置以縣東洪杜山爲名貞觀三  
年又北移於洪杜溪麟德二年移理龔湍卽今縣  
理 涪陵江在縣西一百步北流入彭水縣界

洋水縣

西南一百六  
十里元一鄉

唐武德二年於今縣東一百六

十里置盈隆縣貞觀十年移于今理先天元年以  
諱改爲盈川縣天寶元年改爲洋水縣以界內洋



水爲名 羅奈水在縣南一百里 洋水在縣西三十里北流入信寧縣界 卻東水在縣南七十里

信寧縣

西北一百三十里元一鄉

隋大業十二年于今縣西南七

里置以地居信安山遂以信安爲名唐武德二年改爲信寧屬義州五年改義州爲晉州貞觀四年

自故城移于今理十一年改屬黔州 百頃山在

縣東南八十里 涪陵江在縣東二里北流入涪

州武陽界

都濡縣

南二百里元一鄉

唐貞觀二十年析盈隆縣置因界

內都濡水爲名也 丹陽山在縣南二十五里有

丹陽水出焉 波溲水在縣西南一百里又南流

注丹陽水 茆醬山已上郡界之山水

茆音矩

控臨蕃種落

牂柯

昆明

柯蠻

桂州

提光

蠻蠻

葛獠

沒夷

巴

尙抽

勃儼

新柯

俚人

莫獠

白虎

管番州五十三

九州每年朝貢

南寧州本清溪鎮唐末置在黔州西南二十九日



行從南寧州至羅殿王部落八日行與雲南接界

充州 珍州 犍州 莊州 明州

牂州 矩州 清州

四十四州洞內羈縻州

柯州 襲州 峩州 蠻州 邦州

鶴州 勞州 羲州 福州 鼓州

儒州 鸞州 令州 郝州 普寧州

總州 邠州 勳州 功州 散州

候州 晃州 茂龍州 整州 懸州

樂善州 契州 添州 延州 雙城州

訓州 卿州 撫水州 思源州 逸州

殷州 南平州 盧州 姜州 稜州

鴻州 和武州 渾州 亮州

校勘

黔州 總序

又領五十州皆羈縻寄治山谷

按今記所載五十州實四十八州其二州

關與舊唐書地理志合然新唐書志乃五

十一州黔州圖經又五十三州皆未知孰

是今取新唐志與圖經合而今記誤者改



正餘悉仍其故以存疑

太平寰宇記卷之一百二十終

太平寰宇記卷之一百二十一

江南西道十九

夷州

播州

費州

夷州

夷州

義泉郡今理綏陽縣

禹貢荊州之域外古蠻夷荒徼之地

漢爲牂柯郡境歷代恃險不聞臣附隋大業七年始招慰置綏陽縣屬明陽郡今夷寧縣西北八十里舊明陽縣是也以縣屬焉唐武德四年罷郡置夷州于思州寧夷縣領夜郎神鳳豐樂綏養雞翁伏遠明陽高富寧夷思義丹川宣慈慈岳十三縣



六年廢雞翁縣貞觀元年廢夷州仍省夜郎神鳳  
豐樂三縣以伏遠明陽高富寧夷思義丹川六縣  
隸務州宣慈慈岳二縣隸溪州綏養縣屬智州四  
年於黔州都上縣復置夷州六年復分置雞翁縣  
十一年以義州之綏陽黔州之高富二縣來屬其  
年又自都上縣移于今理領綏陽都上高富雞翁  
四縣貞觀十七年又以廢牢州義泉洋川二縣來  
屬天寶元年改爲義泉郡乾元元年復爲夷州

領縣五

綏陽 都上 義泉 洋川 寧夷

州境

舊闕

東西 南北

四至八到

北至東京四千一百三十五里  
北至西京三千九百三十五里  
東北至長安取江陵府路四千一百五十五里北  
取萬州路至長安三千七十里

東至思州六百里

南至涪州五百二十三里

西南至播州二百四十里



北至黔州六百里

東南至費州

闕

東南至思州五百八十里

東北至思州四百里

戶

唐開元戶一千二百八十四

風俗

同黔中而蠻夷之俗頗有不通

土產

茶 硃砂 水銀 蠟燭 犀角

綏陽縣

四鄉漢牂柯郡地隋大業四年招慰置綏陽縣

古徼外夷也唐武德三年屬義州貞觀十二年改

屬夷州 波利山在縣北二十里 安徼水一名

孤徼水西自綏養故縣來東流經縣南八里又東

入都上縣界 涪江水在縣東十八里南流注安

徼水 綏陽故城在今縣西三里貞觀十二年移

于今理故城存

都上縣

東南五十二里元四鄉

隋置唐武德元年屬黔州貞觀

四年置夷州為理所十一年州移治綏陽縣 涪

水一名洑野水西北自綏陽縣界流入經縣西十



四里又析西南流入廢雞翁縣界

義泉縣

西南一百里元管三鄉

本牂柯地隋大業十一年置初

屬明陽郡唐武德二年改屬義州五年改義州為

智州貞觀十一年又於縣理置牢州十七年廢牢

州復為縣屬夷州 離支水東北自廢綏養縣流

入西流經縣理西又東南流入廢樂安縣界

洋川縣

西北一百里元三鄉

本牂柯地唐武德二年于縣東北

七十里置洋川縣屬義州貞觀元年改屬思州開

元二十五年復屬夷州 小水西南自廢高富縣

流入東北經縣七十里又北入務川縣界

寧夷縣

元管三鄉

舊屬思州唐開元二十五年屬夷州

廢高富縣在今州東北一百一十里隋大業七年

于廢縣南三十里置屬明陽郡末年陷夷獠唐武

德四年安撫再置屬夷州貞觀元年改屬務州十

年又改屬黔州十一年復屬夷州其年自縣南三

十里故城移于廢縣復有小水在故縣南三十里

東入寧夷縣界其縣永徽後廢 廢雞翁縣城在

縣西南七十里唐武德四年置屬夷州六年廢貞

觀十八年再置并有泅野水一名涪水東自都上

縣界流入經縣南三里又南入費州城樂縣界其



縣永徽後廢

播州

播州

播川郡今理遵義縣

按郡地卽秦夜郎且蘭二郡西南隅

之地秦惠王十四年欲得楚黔中地以武關關外之地易之今疑黔府卽總謂黔中地其地分合屬於楚至漢武元鼎六年平西南夷置牂柯郡其地屬焉漢書唐蒙上書說武帝曰竊聞夜郎國所有精兵可得十萬浮船牂柯出其不意此制越一奇也上乃拜蒙爲郎中將從巴笮關入見夜郎侯厚賜諭以威德約爲置吏夜郎旁小邑皆貪漢繒帛

以爲漢道險終不能有也迺且聽蒙約還報乃以爲犍爲郡發巴蜀卒治道自犍道指牂柯江司馬相如又往諭意皆不聽命數反叛及南越反上使馳義侯因犍爲發南夷兵且蘭君乃反殺使者會越已破引兵誅且蘭遂平南夷置牂柯郡以且蘭有椽船牂柯處因以此立郡以名焉其後以蠻夷隔越莫詳廢置唐貞觀九年于牂柯北界分置郎州領恭水高山貢山柯盈邪施釋鷲六縣十一年省郎州及六縣十三年又于其地置播州以其地有播川爲名仍再置恭水等六縣十四年改恭水



九平寰宇記 卷之二十一 五  
為羅蒙縣高山為舍月縣貢山為胡江縣柯盈為帶水縣邪施為羅為縣釋鷲為胡刀縣十六年又改羅蒙為遵義縣二十年以夷州之芙蓉瑯川二縣來屬顯慶五年廢舍月胡江羅為三縣景龍三年廢莊州都督府以播州為都督府先天二年罷都督以黔州為都督府開元二十六年又廢胡刀瑯川兩縣天寶元年改為播川郡乾元元年復為播州

領縣三

遵義 帶水 芙蓉

州境 舊闕

東西

南北

四至八到

東北至東京 闕

東北至西京四千一百四十五里

西北至長安取江陵府路四千三百五十五里北

取開州路至長安三千二百七十里

東北至黔州八百里

東南至牂柯北界巴江鎮七十里

東南至牂柯瑤州三百二十里



東北至費州四百里

西北至珍州二百里

戶

唐開元戶一百長慶戶四千七百口二萬三千

皇朝管戶

關

風俗

同黔州

人物

無

土產

元貢蠟 生黃茶

遵義縣 元三鄉 唐貞觀九年置恭水縣屬郎州十一年

省十三年復置屬播州十四年改爲羅蒙縣十六

年改爲遵義 禽陵山在縣東四十五里 夷牢

水西自帶水縣來東流經縣北一里又屈曲南流

入廢胡刀縣界

帶水縣 西七十鄉 唐貞觀九年于縣西北八十里置天

寶中移于今理 帶水源出故縣西大山東流經

縣城北又東流至廢胡刀縣界注胡江水 夷牢

水在故縣北二十里東流

芙蓉縣 東北六十鄉 唐貞觀五年置屬邠州尋以縣屬

牢州十六年廢牢州改屬夷州二十年又改屬播



州初置在芙蓉山上為名後移于縣東南三里

邠音于水在縣東三十里南流 仁水在縣西南一

里東南流經邠水 廢舍月縣在州東南九十里

唐貞觀九年于縣理置高山縣十四年改為舍月

縣以界內舍月山為名又有涪陵江在縣東九十

里 廢胡江縣在州東南四十里唐貞觀九年于

縣置貢山縣十四年改為胡江縣以界內江名邑

又有巴水在縣南三十四里 廢羅為縣在縣西

南二百里唐貞觀九年于縣理置邪施縣十四年

改立羅為縣以界內羅為水為名按水源自縣西

一百里羅為山出流經縣南一里又東流至胡江

縣界入涪陵水至顯慶五年廢今廢城見存 廢

胡刀縣在縣西南五十里唐貞觀九年于縣理置

釋鷲縣十四年改為胡刀縣因胡刀水在縣南一

里東流合胡江水在縣理東北流以為名開元二

十六年又廢

費州

費州

涪川郡今理涪川縣

春秋時屬楚漢元鼎六年建牂柯郡

其地屬焉江山阻遠久不臣附至後周宣政元年

信州總管龍門公裕王述招慰生獠王元殊多質



太平寰宇記 卷之二十一  
等歸國遂肇立為費州因州界費水以立郡名按九州要記云九邱之外有費州是也按賈氏縣道記云隋開皇五年于州理置涪川縣屬黔州唐武德元年又以涪川扶陽二縣屬思州貞觀四年分思州涪川扶陽二縣置費州其年又割黔中之相永萬資二縣來屬八年又割思州多田城樂二縣來屬十一年廢相永萬資二縣天寶元年改為涪川郡乾元元年復為費州

領縣四

涪川 城樂 多田 扶陽

州境 舊關

東西 南北

四至八到

西北至東京 舊關

西北至西京三千五百里

西北至長安取江陵府路四千三百三十五里若

取萬州路三千二百五十里

東至安南獠二百三十五里

東至獎州水陸相兼六百里

南至思州思王縣二十七里



正南微西至牂柯充州一百九十里

西至城樂縣二百四十里

北至思州水路五百里

西至播州四百里

正北至西至珍州一百九十里

戶

唐開元戶四千二十九

風俗

地同黔中尤雜生獠

土產

貢朱砂 水銀 犀角

涪川縣三鄉隋開皇五年于今縣北十二里涪陵江岸

置縣唐武德四年屬務州貞觀四年于此置州縣

至十一年與州同移今理 蒙籠山 涪陵山

涪水皆邑界之山水

城樂縣西北一百五十里元三鄉唐武德四年山南道大使趙郡

王孝恭招慰生獠置始築城人歌舞之遂以為名

初置屬思州貞觀八年割屬費州 蒙籠山在縣

南十里 涪陵水在縣南一百五十里

多田縣西北四十里五里二鄉唐武德三年務州刺史奏置以地



太平寰宇記 卷之一百二十一  
土稍平田堪種植故以多田爲名 畬凍山在縣西北一里 涪陵水自西南來經縣南五十步又北流入思王縣界

扶陽縣

西北八十五里元二鄉

隋仁壽四年庸州刺史奏置于

扶水之北因此爲名唐武德四年隸思州貞觀四年改屬費州 涪水源出縣西大山中東流經縣理西四里又東入涪川縣界

太平寰宇記卷之一百二十一終

太平寰宇記卷之一百二十二

江南西道二十

思州

南州

西高州

溱州

牂州

自牂以下六州舊廢

莊州

瑛州

沅州

充州

業州

思州

思州

蠻夷郡今理務川縣

春秋時楚地自戰國以後土地與黔

中同晉陷蠻夷無復郡縣至後周方得其地未爲郡縣隋初其地屬清江郡至開皇十九年于此置



務川縣屬庸州庸州卽今黔江縣是也大業二年廢庸州以縣屬巴東郡唐武德四年招慰使冉安昌以務川當牂柯要路須置郡以撫之復于縣理置務州領務川涪川扶陽三縣至貞觀元年以廢夷州之伏遠寧夷思義高富明陽丹川六縣廢思州之丹陽城樂感化思王多田五縣來屬其年省思義明陽丹川三縣二年又省丹陽一縣四年改務州爲思州以界內思邛水爲名其年以涪川扶陽二縣割入費州八年又以多田城樂二縣割入費州又廢感化縣十年又以高富縣割入黔州十一年又省伏遠縣但領務川思王寧夷三縣開元四年又以州東立思邛縣二十五年割寧夷縣屬夷州天寶元年改爲寧夷郡乾元元年復爲思州領縣三

務川 思王 思邛

州境

關

東西

南北

四至八到

西北至東京四千三百七十里  
西北至西京三千九百五十里



西北至長安取江陵府路三千九百三十五里取  
萬州路二千八百五十里

東至溪州三百里

南至費州水路四百里

南至涪州五百里

西至夷州六百里

北至黔州二百八十七里水路三百五十里

東南至錦州常豐縣五百里

東南至辰州麻陽縣一千六百里

西南至夷州都上縣五百四十里

西北水路至黔州三百一十里

東北至黔州黔江縣一百九十里

戶

唐開元戶一千五百九十九

皇朝戶闕

風俗

同黔中地在荒徼之外蠻獠雜居言語各異

土產

朱砂元貢

水銀

茶

蠟

常賦

務川縣

二鄉

漢西陽縣地屬武陵郡隋朝招慰置務川



縣唐武德元年招慰使冉安昌以務川當牂柯要  
路請置務州貞觀八年改爲思州以思邛水爲名  
思唐山在州東四里南連河只水北枕內江水  
白茶水在州東一百七十里北接黔州黔江縣  
暗山在州西北二百八十里接夷州寧夷縣其  
山常雨霧昏冥故曰暗山 巴江水出西南牂柯  
界經費州從當州西過 河只水在縣東二十一  
里河只者獠之姓名 羅多水在縣東八十里羅  
多者獠之姓名 河渝水在州北十九里自獠山  
流來 都來水在縣西北二百五里從寧夷縣來

思王縣

南水路三鄉

唐武德三年置屬思州貞觀元年

改屬務州四年還思州 守慈山在州南三百五

十里接費州多田縣東臨內江水慈喉灘 思王

山在州西南三百七十里與費州扶陽縣分界本

名龍門山改名思王山 思邛山在縣東南連思

邛水 思邛水在州南三百里出思邛山流入內

江

思邛縣

東南三百九十里四鄉

唐開元四年招集生夷獠以置

按縣道四夷述云此邑最僻遠東至溪州三亭縣  
四百五十里東南至錦州常豐縣二百里 無黨



山在縣西十里四面懸絕 都來山在縣東二十  
五里接錦州常豐縣 都波山在縣東至錦州洛  
浦縣北連溪州三亭縣 思邛水本出錦州洛浦  
縣界經本縣四十步至思王縣流入內江水

### 南州

南州南川郡今理南川縣禹貢梁州之域周省梁入雍戰國時

爲巴國之界秦則巴郡之地漢爲江州之境唐武  
德二年割渝州之東界地置州領隆陽扶化隆巫  
丹溪靈水南川六縣三年又改爲夔州四年又改  
爲南州貞觀五年又置三溪縣七年又置當山嵐

山歸德汶溪四縣八年又廢當山嵐山歸德汶溪  
四縣十一年又廢扶化隆巫靈水三縣但領隆陽  
丹溪三溪三縣貞觀十七年又廢三溪縣先天元  
年改隆陽爲南川縣天寶元年改州爲南川郡乾  
元元年復爲南州又按九州要記云夔溪生獠招  
慰以置之卽此郡也

### 領縣二

南川 三溪

州境關

東西

南北



四至八到

東北至洛京四千二百二十里

東北至長安三千一百六十里

東至渝州界丹上山六十里

南至溱州界五十里

西至黔州界四百里水路一千里

北至渝州江津縣二百三十里

東南至溱州界三百五十里

西至波汀州八十里

西南至溱州界七十里

東北至渝州五十七里

戶

唐開元戶四百四十三

皇朝戶闕

風俗同渝州

土產

象牙 犀角 班布

南川縣五鄉漢江州縣之地漢書地理志江州縣屬巴

郡自漢迄齊仍為江州之地周閔帝元年改為江

陽縣其地仍屬不改隋開皇三年改江陽為江津



縣其地又屬唐立郡于此又改爲隆陽縣後避諱  
改爲南川縣 羅緣山在縣南十二里 熒溪水  
南自廢丹溪縣來北流經縣東南四十步又北入  
渝州江津縣界 廢丹溪縣在縣東南三十里武  
德二年于丹溪水曲置因以爲名又有盈山在廢  
縣東七十六里

三溪縣

東二百一里三鄉

唐貞觀五年置按縣地有熒溪東

溪葛溪三溪水合流因以爲名其縣理城俗名石  
城甚高險 熒溪水在縣西北流入蜀江

西高州

西高州

夜郎郡今州理夜郎縣

州卽同夷州古山獠夜郎國之地

按九州志云夜郎自古非臣服州郡之地昔漢武  
帝開拓南邊始置夜郎縣屬牂柯都尉居之八郡  
志云夜郎之西岳去郡四百里司馬相如所開之  
處後漢書曰夜郎者臨牂柯江江廣百餘步足以  
行船唐蒙發巴蜀卒治道自熒道抵牂柯江卽謂  
此地十三州志云牂柯者江中山名晉永嘉二年  
分牂柯置夜郎郡兼置充州唐貞觀十七年廓闢  
邊夷置播州鎮後因州中有降珍山乃以鎮爲珍  
州取山名郡也長安四年又改爲舞州開元十三



太平寰宇記卷之百三十三  
年改爲鶴州十四年復爲珍州至皇朝乾德四年  
刺史田遷上言自給賜珍州郡名以來連罹火災  
乞改州名因改爲高州尋以嶺南有高州故加西  
字

領縣四

夜郎 麗臯 榮德 樂源

州境

關

東西

南北

四至八到

東至東京

關

西北至西京四千三百三十五里

西北至長安取江陵府路四千五百五十五里取

開州路三千四百七十里

東南至播州三百里

正東徼北至夷州二百里

北至溱州二百四十里

西接夷獠界

戶

唐開元戶二百六十三

風俗



其俗多雜生獠語言或通

土產

貢金及象齒

夜郎縣二鄉唐武德二年以梓潼縣為充州與牂柯同

置開元十五年改為夜郎縣

麗阜縣二鄉

榮德縣四鄉

樂源縣

以上三縣皆唐貞觀十六年開山洞分夜郎之地以置其縣並在州側近或十里或二十里隨所畚

田處為寄理移轉不定其所

溱州

溱州

溱溪郡今理榮懿縣

土地所屬與夷州同唐貞觀八年開

拓南蠻至十七年置溱州及榮懿扶權樂來三縣

咸亨元年廢樂來天寶元年改為溱溪郡乾元元

年復為溱州

領縣二

榮懿 扶權

州境闕

東西

南北



四至八到

東北至洛陽四千二百九十里

東北至長安三千四百三十里

正南微東至珍州二百里

北至南州二百七十里

東至涪州賓化縣接界山險不通無里數

西至瀘州合江縣接界

東北取珍播夷路至黔府一千三百里

戶

唐開元戶八百九十二

風俗 關

土產

文龜 班竹 象牙 貢入

榮懿縣 四鄉 唐貞觀十七年與州同置以領獠戶

扶權縣 西南五十里一鄉 唐貞觀十七年與州同置以縣東

扶權山為名也

牂州

牂州 牂川郡今理建安縣 按其地即與播州同漢武時唐蒙因

上書說武帝以奇制越誠以漢之強巴蜀之饒為

置吏甚易上許之唐武德二年立充州因是置播



六平寰宇記 卷之一百二十二  
牂等郡焉按梁氏十道志云在開元初猶有此郡  
後之郡國記錄乃無此州之名

領縣三

建安 賓化 新興

州境闕

東西

南北

四至八到

東北至西京六千二百三十七里  
東北至長安五千六百三十七里

戶

天寶領戶二萬三千八百四十九

風俗闕

土產

熊羆 狐狸之皮 隔織 麝香

建安縣三鄉漢牂柯郡也國志曰京西南五千六百三

十七里卽牂柯是也 高連山 石門山 四十

九頭山 木瓜山 古牂柯郡城華陽國志云牂

柯郡上當天井故多雨潦今有古城在郡西卽漢

未伏之時所保于此 石潼關華陽國志云且蘭

縣西南有地名石潼關 柱蒲關漢書云牂柯郡



有柱蒲關

賓化縣

新興縣

已上三縣並唐武德中因州置

莊州

莊州自古與夷珍等郡地同漢武始闢西南夷卽此  
爲犍爲牂柯郡地後漢吳霸爲郡守有善政至今  
人猶祠之號爲侯神隋平陳分牂柯郡立南壽州  
貞觀中改爲莊州隸黔中天授三年升爲都督府  
統三十六州或云楚威王時有莊躄將甲士二萬  
人入牂柯故取莊爲州名按開元十道記云有此  
郡額後之志錄則廢之州境四至戶口人物風俗  
土產貞觀以來記誌並不述

領縣八

石牛 南陽 輕水 多樂 樂安 石城 新

安 賓化

已上八縣皆唐貞觀以來相次建置永徽以後併  
省

瑤州

瑤州與莊州同置

太平寰宇記

卷之一百二十二

七



領縣五

武侯 望仁 應江 始安 東安  
已上五縣皆貞觀中置永徽以後併省

沅州 廢

沅州 潭陽郡今理龍標縣 禹貢荊州之域戰國時楚黔中地秦

置黔中郡其地又屬焉漢為舞陽縣地屬武陵郡  
盛弘之荊州記云舞陽縣北拒天門淩中縣南極  
邵陽武岡縣西接寧州牂柯在舞水之陰隋開皇  
九年平陳省入辰溪縣荊州記云舞陽有詹辰新  
豐二縣烏滸萬餘家噉蛇鼠之內能鼻飲唐貞觀

八年分辰州龍標縣置巫州其年置夜郎沅溪 舊唐

志為郎溪 思徵三縣九年廢思徵縣天授三年風俗使

右肅政臺御史席元明奏巫山不在州界請為沅  
州分夜郎置渭溪縣長安二年割夜郎渭溪二縣  
置舞州先天二年又置潭陽縣開元十三年改沅  
州為巫州天寶元年改為潭陽郡乾元元年復為  
沅州

領縣二

龍標 沅溪

四至



太平寰宇記 卷之一百二十二  
三  
東北至西京五千八百三十里

東南至長安三千一百五十八里

戶

天寶戶五千三百六十八口二萬二千七百三十

風俗

有烏澣之民噉蛇鼠之肉

土產

朱砂

龍標縣州理漢舞陽縣地五溪蠻之境屬武陵郡後漢省入辰陽又爲辰陽縣地晉太康中復置舞陽

縣隋平陳置辰州又屬焉

沅溪縣漢鐔成縣地唐貞觀八年置取縣界沅溪水爲名 沅溪又名滂流水西南自獠界流入夜郎縣漢舞陽縣地屬武陵郡後漢省入辰陽又爲辰陽之地 砂窟朱砂井小黑不及辰溪者 舞陽水出故且蘭縣郡國志云龍標有小西山武陽山有美人每土人聚卽來人眾莫能辨唯腳指向後而踵向前以刀斧斬之不死唯以杉木爲刀擬之卽去

充州



充州故夜郎侯邑牂柯都尉居之屬牂柯南中八郡  
悉夜郎之西垂去郡四百里是司馬相如所開之  
處漢書曰夜郎者臨牂柯江江廣百餘步足以行  
舟又云唐蒙發卒治道自犍道抵牂柯土地十三  
州志云牂柯者江中山名也晉懷帝永嘉五年分  
牂柯置夜郎郡

領縣四

梓潼 底水 思王 思渝

業州廢

業州龍溪郡今長安四年分沅州二縣置舞州開元

十三年又改爲業州天寶元年改爲龍溪郡乾元  
元年復爲業州

領縣三

峨山 渭溪 梓薑

四至

東北至洛京三千九百里

東北至長安四千一百九十七里

戶

舊管戶一千六百七十二口七千二百八十四

風俗



太平寰宇記卷之一百二十三  
土產

已上與沅州同

峨山縣唐貞觀八年置夜郎縣屬巫州長安四年置  
舞州開元二十年改夜郎爲峨山縣

涓溪縣天授二年分夜郎置屬沅州長安四年改屬  
業州

梓薑縣舊于縣置充州天寶三年以充州荒廢以梓  
薑屬業州其充州爲羈縻州

太平寰宇記卷之一百二十三終

太平寰宇記卷之一百二十三

淮南道一

揚州

揚州廣陵郡今理江  
都廣陵二縣禹貢淮海惟揚州唐虞淮海之

閒皆州域也爾雅江南曰揚州言江南之氣躁勁

厥性輕揚故曰揚州天文斗牛之分星紀之次七

國時屬楚秦滅裂楚爲九江郡地項羽以封英布

高帝封其兄子濞景帝四年更名江都國自此或

爲郡或爲國廢置不恆前漢揚州無定理後漢揚

州方理歷陽又徙陰陵魏揚州刺史理壽春吳自



太平寰宇記 卷之一百二十三  
壽春移理建業元帝渡江歷江左揚州常理建業  
江都郡立爲南兖州梁末入北齊改爲東廣州歸  
陳復舊名入周又爲吳州置總管府隋開皇九年  
改爲揚州仍爲總管煬帝改爲江都郡移于坊內  
于州置宮號江都宮武德二年賊帥李子通自海  
陵率眾攻破州城遂竊據之三年子通爲杜伏威  
所破未幾伏威歸化于潤州江寧縣置揚州以隋  
江都爲南兖州置東南道行臺六年輔公祏竊號  
江南驅擁江北諸州毀撤宮殿盡過江南城遂荒  
廢七年趙郡王孝恭討平公祏改南兖州爲邗州

九年省江寧縣之揚州改邗州爲揚州大都督府  
督揚和滁楚舒廬壽七州貞觀十年改大都督爲  
都督督揚滁常潤和宣歙七州龍朔二年升爲大  
都督府天寶元年改爲廣陵郡依舊大都督府乾  
元元年復爲揚州自後置淮南節度使親王爲都  
督領使長史爲節度副大使知節度事恆以此爲  
治所與成都府號爲天下繁侈故稱揚益焉皇朝  
因之

元領縣七

今三

江都 廣陵 六合



四縣割出

高郵

建軍

天長

建軍

海陵

入泰州

永貞

入建安軍

州境

東西二百二十五里 南北一百六十七里

四至八到

西北至東京一千四百二十里

西北至西京一千九百四十里

西北至長安二千七百里

東至海五百六里至泰州九十五里

南至大江三十里渡江至潤州七十里

西至滁州二百里

北至楚州三百里

東南至海四百里至泰興縣界八十里

西南至和州三百六十里

西北至泗州二百里

東北至泰州鹽城縣三百六十里

戶

唐開元戶六萬一千四百一十七

皇朝戶主一萬四千九百一十四客一萬四千七

百四十一



風俗

其俗輕揚淫泆好學工文其民織紵稼穡

姓氏

廣陵郡四姓 戴 高 盛 游

人物

召平 廣陵人封侯 劉瑜 字季節廣陵人 陳矯 字季弼廣陵人官尚

書 陳琳 字孔璋善為檄書建 劉敬叔 廣陵人 曹憲 江都人仕

張紘 廣陵人 盛彥 母日失明因食 徐鉉 字鼎臣廣陵人 李善 揚州江都人注文選

隋為秘書 來濟 江都人相高宗父護兒隋開府故 李善 揚州江都人注文選

為大學士 徐鉉 字鼎臣廣陵人 李善 揚州江都人注文選

為六卷 李邕 善

土產

莞席 錦綺 白綾 銅鏡 柘木

江都縣 舊二十五鄉今本秦廣陵縣地屬廣陵漢景帝

立江都國遂因國以建縣焉 大銅山在縣西七

十二里即漢書稱吳王濞即山鑄錢此其處也

蜀岡圖經云今枕禪智寺即隋之故宮岡有茶園

其茶甘香味如蒙頂 蕪城即州城古為邗溝城

也漢已後荒毀宋文士鮑明遠為賦即此 廣陵

按郡國志云州城置在陵上爾雅云大阜曰陵一



名阜岡一名崑崙岡故鮑照蕪城賦云拖以漕渠  
軸以崑崙河圖括地云崑崙山橫爲地軸此陵交  
帶崑崙故云廣陵也 大江西南自六合縣界流  
入晉祖逖擊楫中流自誓之所南對丹徒之京口  
舊闊四十餘里謂之京江今闊十八里魏文帝登  
廣陵觀兵戎卒十餘萬旌旗數百里臨江見波濤  
洶湧而歎曰吾武騎萬隊何所用之嗟乎此天所  
以限南北也 江都故城在縣西南四十六里城  
臨江水今爲水所侵無復餘址 臨江宮隋書云  
大業十三年二月大駕出揚子幸臨江宮大會賜

食并百僚亦餞于凝暉殿庭酺戲爲樂數日時羽  
葆初成霜戈花氅羽旆龍旂橫街塞陌二十餘里  
暉翳雲日前代羽衛無盛斯時 十宮在縣北五  
里長阜苑內依林傍澗竦高跨阜隨城形置焉竝  
隋煬帝立也曰歸雁宮回流宮九里宮松林宮楓  
林宮大雷宮小雷宮春草宮九華宮光汾宮是曰  
十宮 東府齋梁宣城王爲揚州刺史顧野王及  
王褒竝爲賓客野王好丹青善圖畫王于東府起  
齋令野王畫七賢命王褒書贊時人稱爲兩絕  
輿浦按圖經云輿浦朝夕往來恆有遊濁及乎一



朝清徹後漢太守范邈表以爲瑞也 釣臺西征  
記曰雷陂有臺高二丈又南兗州記云卽吳王濞  
之釣臺 風亭月觀吹臺琴室竝在宮城東北角  
池側沈約宋書云徐湛之爲南兗州刺史營構亭  
館以極遊宴之娛又于城南起萬歲樓以望鍾山  
澄月亭懸鏡亭春江亭在縣南二十七里揚子  
宮西以上三亭皆隋煬帝置 雷陂隋煬帝葬于  
其側 厲王胥冢郡國志云廣陵厲王胥冢歲旱  
鳴鼓攻之輒致雲雨抱朴子云吳主時掘大冢有  
崇閣徹道高可乘馬有銅人皆大冠執劍棺中人  
鬢已頽白面體如生以白璧三十枚藉尸舉之有  
玉形似冬瓜從懷中墮地兩耳及鼻中有黃金如  
棗此骸骨因假物而不朽之效也 江祀江妃志  
云歲三祀之以伍員爲配阮昇之南兗州記云其  
神復號江都王或易王廟 東陵聖母廟在縣南  
三十里按神仙傳云東陵聖母海陵人適杜氏師  
劉綱學仙術道成夫不之信也告官拘于囹圄頃  
之聖母已從獄牕中飛出眾人望見之轉高入雲  
中于是立廟遠近敬祀之每表靈驗常有一青鳥  
在祭所人有所失請問所在青鳥便飛集盜物之



上以此路無拾遺 故齊寧縣按阮昇之記云齊高宗建武五年遏艾陵湖水立襄塘屯移縣于萬歲邨中興元年廢縣西南去州城六十一里 張公城圖經云漢末張嬰所築後因號張公城在縣西四十里 孔融墓在高士坊西北去州九里 孝義里按宋書曰劉宗武陽邨人也又阮昇之記云宋文帝時爲上黨太守少有志操居世清謹元嘉二年魏太武兵至廣陵宗母爲軍所害遂蔬食不嘗五味以終世其所住邨因改爲孝義里 孝婦祠漢書于公以爲孝婦必不敢殺姑後祭之卽

雨也 吳公臺在縣西北四里沈慶之攻竟陵王誕所築弩臺也後陳將吳明徹圍北齊東廣州刺史敬子猷增築之以射城內號吳公臺 雷塘在縣東北十里煬帝葬于其地貞觀十八年李襲譽爲揚州長史引雷塘水又築句城塘以溉田八百餘頃百姓賴之徵拜太府卿 愛敬陂在縣西十五里魏陳登爲廣陵太守初開此陂百姓愛而敬之因以爲名亦號陳登塘 合瀆渠在縣東二里本吳掘邗溝以通江淮之水路也昔吳王夫差將伐齊北霸中國自廣陵城東南築邗城城下掘深



水經注卷之二十三  
溝謂之邗江亦曰邗溝自江東北通射陽湖今謂之山陽濁

廣陵縣

舊二十五鄉今二十六鄉

本漢江都縣地宋武帝析地置

之高齊又爲廣陵縣隋初改爲江陽縣按爾雅注云陽在北斯地處江之正北故曰江陽亦因宋舊名也隋末廢併入江都縣唐貞觀十八年長史李操奏割合瀆渠以東九鄉復立焉又按州圖經云大業十二年分江陽又立本化縣于郡南半邏合瀆渠今故城在西北一十八里 桃花基在縣南上有廢吳王廟基卽隋置 邵伯埭有斗門縣東

北四十里臨合瀆渠有小渠闊六步五尺東去七里入艾陵湖按晉書太元十一年太傅謝安鎮廣陵于城東北二十里築壘名曰新城城北二十里築堰名邵伯埭蓋安新築卽後人追思安德比于邵伯因以立名 茱萸溝在縣東北一十里西從合瀆渠東過茱萸埭七十里至岱石湖入西四里對張網溝入海陵縣界按阮昇之記云吳王濞開此溝通運至海陵倉北有茱萸邨以邨立名故記云邗溝卽吳王夫差所開漕運以通上國 張網溝在縣東三十里從岱石湖入四里至溝中心與



海陵分界按後漢書綱為廣陵太守濟惠于百姓  
勸課農桑于東陵邨東開此溝引湖水灌田以此  
立名

六合縣

西南一百一十里舊二鄉今二十一鄉

本楚棠邑春秋時伍

尚為棠邑大夫即此地左氏傳襄公十四年楚子  
為庸浦之役故子囊率師于棠杜預注云庸浦棠  
皆此地也秦滅楚以棠邑為縣漢不改封陳嬰為  
棠邑侯即此也晉安帝于此置秦郡北齊置秦州  
後周改為方州又改為六合郡因六合山為名隋  
廢郡為六合縣唐武德七年又置方州貞觀元年

州廢以縣屬揚州 瓜步山在縣東南二十里東  
臨大江宋元嘉二十七年元魏太武帝嘗率師百  
萬至六合登瓜步山隔江望秣陵纔數十里宋人  
震恐將走會稽遣使求和獻其方物具百牢之禮  
然後乃退 六合山在縣西北七十五里隋開皇  
三年于此置六合鎮九年晉王平陳于此臨江觀  
渡兵馬 小石山一名小帆 赤岸山南兗州記  
云瓜步山東五里江有赤岸南臨江中羅君章云  
赤岸若朝霞即此謂也濤水自海入江衝激六七  
百里至此岸側其勢始衰郭景純江賦云鼓洪濤



太平寰宇記卷之一百二十三  
于赤岸卽此也 銅城郡國志云六合縣有銅城  
卽吳王鑄銅處 滁塘陳壽吳志赤烏十三年孫  
權遣軍十萬作滁塘以滄北道而有斯浦也 石  
梁溪西北自滁州清流縣界流入宋元嘉中石梁  
澗中古銅鐘九口大小行列引次南向刺史臨川  
王獻以爲瑞鐘郡國志云梁于石梁置涇州是也

太平寰宇記卷之一百二十三終

太平寰宇記卷之一百二十四

淮南道二

和州

楚州

鹽城監

和州

和州

歷陽郡今  
理歷陽縣

禹貢揚州之域春秋時楚地左氏傳

云吳取楚太子建之母於巢又云楚子囊師于棠

杜預云楚地和州蓋分爲二邑皆楚境戰國時猶

爲楚地秦屬九江郡漢爲歷陽縣屬郡不改土地

十三州志云揚州後徙于陰陵今按濠州定遠縣

界陰陵故城是也卽知漢末兼爲揚州在吳時爲



重鎮晉為淮南郡地東晉改為歷陽郡又按郡國志云歷陽西過胡城即晉王遵築以禦石虎宋因之兼立南豫州齊梁因之不改梁末侯景亂江北之地盡屬高齊高齊立為和州改臨江為齊江以和州領歷陽齊江二郡後又省齊江并烏江并入歷陽為一郡隋開皇十三年罷郡省齊江之譙縣入歷陽縣以為和州煬帝初州廢復立歷陽郡唐武德三年杜伏威歸順因改為和州天寶元年改為歷陽郡乾元元年復為和州

領縣三

歷陽 烏江 含山

州境

東西七十九里 南北一百八十五里

四至八到

東北至東京一千四百八十里  
西北至西京一千九百里  
西北至長安二千七百四十里  
東渡江至宣州二百五十六里  
南至宣州三百二十六里  
南至廬州二百三十四里



北至滁州一百六十二里

東南至橫江西岸一十五里大江中心為界與宣州當塗縣相接

西南至廬州巢縣界一百四十五里

東北至揚州六合縣界一百五里

西北至廬州慎縣界一百一十里

戶

唐開元戶二萬一千

皇朝戶主四千七百八十九客四千九百六十一

風俗同揚州

人物無

土產

貢紵布 茶 魚 稻

歷陽縣

元十二鄉今八鄉

本漢舊縣也南有歷水故曰歷陽

漢九江都尉居之屬九江郡後漢為揚州刺史所

理之地 雞籠山在縣西北三十五里淮南子云

麻湖初陷之時有一老母提雞籠以登此山乃化

為石今山有石狀如雞籠因名之 六合山梁武

登此山以望六合故名也 梁山在縣南七十里

俯臨江水南對江南之博望山宋書云孝武帝大



明七年祀梁山。大閱水軍于中江。是日有白雀二。集華蓋有司奏請改元爲神雀。帝不許。因立雙闕于梁山。又侯景之亂。梁將王僧辯軍次蕪湖。與景將侯子鑒戰于梁山。大破之。江東岸有博望山。屬姑孰二山。隔江相對望之。如門。南朝謂之天門山。兩岸山頂各有城。竝將軍王玄謨所築。自六代爲都。皆于此屯兵捍禦。橫江浦在縣東南二十六里。建安初。孫策自壽春欲經略江東。揚州刺史劉繇遣將樊能于糜屯橫江。孫策破之。于此對江南岸之采石。往來濟處。隋將韓擒虎平陳。自橫江濟

亦此處也。當利浦在州東十二里。本名揚浦。晉龍驤將軍王濬平吳水軍。揚帆順流于此。而下王渾以旗招不住。濬報云風利不得泊。遂先入石頭。後因以當利爲名。沸井和州圖經云。郡有沸井一所在郡西百步古城內。洞口浦。魏將曹休張遼伐吳至此。吳軍相望。水經注云。江水左列洞口。巢湖東石梁。禹爲理水之門。故置之。今又俗名項口是也。麻湖亦古歷陽城之地。在縣西三十里。源出桑山。淮南子云。歷陽之都。一夕反而爲湖。晉地理志云。漢明帝時。歷陽淪爲麻湖。按淮南子



則云在明帝時繆矣麻湖與皇后

湖名潭亦湖名包浦名

爲一湖分而自殊矣 歷陽湖郡國志云昔有一

書生遇一姥姥待之甚厚生謂姥曰此縣門前石

龜眼赤血出此地當陷爲湖姥後數往候之門吏

問姥姥具以對吏因以硃點龜眼姥見遂走上西

山顧城遂陷爲湖今湖中有明府魚婢魚奴魚

濡須塢在縣西南一百八十里南臨須水狀如偃

月漢建安十七年吳聞曹操將來因築此塢吳錄

云初欲夾水立塢諸軍皆曰上岸擊賊洗足入舟

何用塢爲呂蒙曰兵有利鈍戰無百勝如有邂逅

步騎感人不暇及水豈得入船乎權曰善遂築塢

曹操不能下而退陸士衡辨亡論云濡須之戰臨

川擁銳卽此處也 平疴湯在州北四十五里此

湯能愈疾故曰平疴有碑存 彭祖宅按列仙傳

云歷陽有彭祖宅禱祈風雨應期而至

烏江縣

東北四十里舊十五鄉今四鄉本秦烏江亭漢東城縣地項

羽敗于垓下東走至烏江亭長艤船待羽處也魏

黃初三年曹仁據烏江以討吳晉太康六年始于

東城界置烏江縣隋爲烏江郡 四隴山在縣西

北七十五里項羽旣敗于垓下東走至東城所從



唯二十八騎漢兵追者數千羽乃引騎因四隕山而爲圓陣卽此山也 項亭漢書云漢軍追羽至東城烏江亭長艤船待之卽此今有廟在縣南三里史記云身死東城是也 江水經州城北下五里與上元縣分中流爲界 烏江浦在縣東四里安陽渡在縣東北八十一里與上元縣對界 包浦與陰塘水同入皇后湖湖卽東連包浦西翼

### 潭湖

含山縣

西南五十五里元十二鄉今管四鄉

本晉龍亢縣地晉太興二

年元帝置今縣南有龍亢邨建元初又立蒙縣周

天和元年併入歷陽至唐武德六年改置含山縣八年廢焉長安四年又置改爲武壽縣神龍元年改爲含山縣以縣境眾山所含故名含山縣 大峴山在縣西北一十三里按酈道元注水經云淶水東經大峴山西北流大峴亭卽此山也齊東昏之末裴叔業據壽春叛附元氏東昏遣蕭懿往大峴拒之是其所也 禱應山本名白石山在縣西南八十里列仙傳云歷陽有彭祖石室今山下有洞洞口初俯僂而入約十步乃漸高廣莫知遠近又有二石龍鱗甲皆成卽彭祖所居之室洞出鍾



乳常有石燕飛集唐開元二十年勅禁樵採賜名  
禱應山大麻中有道士商棲霞歷陽人也居此絕  
粒三十餘年身輕若飛 新婦港在縣南一百七  
十里源從東關來經當縣界二十里入大江昔有  
人居此江口新婦至孝故以爲名 斗米逕水在  
縣西南八十里按舊經歷陽豪傑李子建當隋末  
杜伏威之起從伏威守城伏威分兵戍柵口欲開  
路運糧以救軍食子建請以東關下開溝通黃港  
陂入歷湖率都下人各賚米一斗就功米盡逕成  
饋運無闕故謂之斗米逕 廢龍亢縣在縣東南

四十里輿地志云舊屬譙國周大象元年拓定江  
淮併入歷陽依舊爲龍亢縣隋平陳後以其地還  
歷陽唐分歷陽爲含山縣此屬焉 東關在縣西  
九十里按輿地記云南譙郡蘄縣界有巢湖湖東  
南口有石梁鑿開渡水名東關古老相傳夏禹所  
鑿高峻險狹實守扼之所吳魏相持于此南岸吳  
築城北岸魏置柵 魏武帝祠在縣西南九十里  
按魏志建安十八年曹操侵吳樓船東泛巢湖將  
逼歷陽至濡須口登東關以望江山後人因立祠  
焉 江水在縣南一百七十里



楚州

楚州

淮陰郡今理山陽縣

禹貢揚州之域春秋時屬吳吳越春

秋云吳將伐齊自高陵掘江通淮卽此是也戰國時屬楚史記云越已滅吳而不能正江淮北楚乃東侵廣地至于泗上今泗州是也秦併楚置三十六郡蓋屬九江郡卽射陽縣之地漢書地理志云射陽屬臨淮郡在徐州之部續漢書郡國志云射陽屬廣陵郡下邳國自魏至西晉俱爲臨淮廣陵二郡地東晉爲重鎮元帝以劉隗屯守穆帝時中郎將荀羨北討云舊淮陰鎮地形都要水陸交通

易以觀釁沃野有開殖之利方舟運漕無他屯阻乃營立城池焉宋書郡國志并山川記云安帝義熙元年省射陽縣分廣陵之鹽城地立山陽東城左鄉三縣爲山陽郡屬南徐州宋因之郡國志云北對清泗臨淮守險有平陽石髓田稻豐饒義熙中僑立兗州入齊因以兗州爲重鎮梁初得之尋入後魏又爲山陽郡隋初郡廢爲楚州煬帝初州廢以地併入江都郡唐武德四年臧君相歸附立爲東楚州領山陽安宜鹽城三縣八年廢西楚州以盱眙來屬仍去東字天寶元年改爲淮陰郡乾



元元年復為楚州後唐天成三年升為順化軍節度周顯德五年平淮南降為防禦州皇朝為團練州

元領縣五 今四

山陽 淮陰 寶應 鹽城

一縣割出

盱眙入泗州

州境

東西四百七十六里 南北二百七十里

四至八到

西北至東京二千二百五十五里

西北至西京一千六百七十里

西北至長安二千五百三十里

東至海二百一十五里

南至揚州三百里

西至泗州傍淮路二百二十里

北至漣水運路至海四百一十五里

北至淮七十里

東南至泰州界八十里海陵縣是也

西南至招義縣四百二十里



西北至泗州二百六十二里  
東北至淮口入海水路一百八十里

戶

唐開元戶一萬四千七百四十八

皇朝戶主一萬五百七十八客一萬三千八百三十九

風俗

漢書地理志楚俗同揚州

人物

韓信

淮陰人

枚乘

字叔淮陰人

枚皋

字少孺乘子

土產

絲絹 貨布 淮白魚

山陽縣

元九鄉今四鄉

本漢射陽縣地在射水之陽故曰射

陽漢高祖封劉纏為射陽侯晉義熙九年省射陽

縣置山陽郡屬徐州又立山陽縣以隸焉以境內

有地名山陽因名郡戴延之西征記云山陽津名

山陽漢吳王濞反于廣陵山陽王率眾于此拒

之因名山陽以旌忠也 石鼈山郡國志云山有

石鼈游因名之今山下有鄧艾築城存 茶陂按

淮陰圖經云縣南二十里有茶陂 淮水酈道元



注水經云淮水之會卽城角也左右兩川翼夾二水入之卽謂泗口也 邗溝水南自安宜縣界流入吳越春秋云吳將伐齊北霸中國自廣陵掘江通淮運糧之水路也 南昌亭在縣西三十五里史記云韓信布衣時從南昌亭長寄食亭長妻患之乃晨炊蓐食餐時不爲具食信竟絕之信爲楚王都下邳至國召亭長賜錢百萬曰公小人也爲德不卒 都梁宮煬帝置以避暑 公路浦淮口也昔袁術向九江將奔袁譚路出斯浦因名之淮陰縣故城水經注云淮水又東經淮陰縣故城

北臨淮水漢書高帝六年封韓信爲淮陰侯昔韓信去下邳而釣于此處今城東二冢西冢漂母墓也昔漂母食信于淮陰信爲楚王于下邳立冢增墳以報母也東冢卽信母墓也 漢高祖廟在縣西四十五里惠帝元年令郡諸侯王立高帝廟至今猶存 射陽湖在縣東南八十里漢書廣陵王胥有罪其相勝之奏奪王射陂卽此也今謂之射陽湖與鹽城寶應三縣分湖爲界大厯三年與洪澤竝置官屯自後所收歲減今竝停廢 故倉城東南接州城隋文帝初將伐陳因舊城修築儲蓋



軍糧有逾百萬迄于大業末年恆有積穀隋亂荒廢

淮陰縣西五十里舊七鄉今四鄉本漢舊縣屬臨淮郡宋于此置

北兗州後廢隋開皇三年又置淮陰縣濁水今

謂之山陽濁東南自州郭下西北流經縣北流入

于淮卽古之邗溝昔吳夫差將伐齊北霸中國自

廣陵掘江連淮以通糧運舊水道屈曲多諸梁埭

隋文帝重加修掘通利焉韓信城信本此縣人

其冢宅處所竝存後受封爲侯因築此城淮水

在縣西二百步枚乘宅墓在縣南二百步趙嘏

詩云家在枚舉舊宅傍卽此也白水塘在縣南

九十五里故老云鄧艾平吳時修此塘置屯四十

九所灌田以充軍儲淮陽婆羅樹碑在縣南二

百步海州刺史李邕文并書鹽瀆漢書淮陰鹽

瀆屬臨淮郡

寶應縣南九十里舊十四鄉今六鄉本安宜縣梁氏志云本漢安

平縣屬廣陵郡唐武德四年于此立倉州領安宜

一縣七年州廢縣隸楚州肅宗末以獲天寶因改

爲寶應縣安宜溪在縣界古安宜邑因此溪爲

名白水陂在縣西八十五里鄧艾所立與盱眙



縣破釜塘相連開八水門立屯溉田萬二千頃大業末破釜塘壞水北入淮白水塘因亦竭涸今時雨調適猶得灌田射陽湖在縣東六十里中流與鹽城分界箕山在縣東六十里得寶記按楚州刺史鄭輅撰記云開元中有李氏女子嫁賀若氏既寡爲尼名真如家于鞏縣天寶元年七月七日有五色雲自東方而來雲中有人引手授以一囊令寶之及天寶末真如流寓安宜縣肅宗元年建子月十八日夜真如忽見皂衣二人引去東南奄至一城樓觀嚴飾見天帝謂曰下界喪亂殺

氣腥穢達于諸天莫若以神寶壓之乃授以第二寶復謂真如曰前所授汝小囊有寶五段人臣可得見之今者八寶唯王者所宜見真如具以聞官建巳月上達肅宗方疾視寶促召代宗謂曰汝自楚王爲太子今上天賜寶于楚天祚汝也因改號寶應元年升楚州爲上州縣爲望縣改安宜縣爲寶應真如所居之地得寶河壩高敞境物潤茂後爲六合縣尉崔瑄所居兩堂之間西域胡人過嘗望而瞻禮也八寶一曰如意寶珠二曰紅鞋鞞三曰琅玕珠四曰玉印五曰皇后採桑鉤二枚六曰



雷公石二枚其五寶一曰玄黃天符二曰玉雞三曰穀璧四曰王母玉環二枚

鹽城縣東南二百里元四鄉本漢鹽瀆縣屬臨淮郡晉安帝更

名鹽城縣偽唐割屬泰州皇朝太平興國三年卻

割還楚州海水阮昇之南兗州記曰上有南兗

州鹽亭一百二十三所縣人以漁鹽為業略不耕

種擅利巨海能致饒沃公私商運充實四遠舳舻

往來恆以千計此吳王所以富國強兵而抗漢室

也射陽湖在縣西北一百二十里湖闊三十丈

通海三百里預五湖之數也

### 鹽城監

鹽城監古之鹽亭也歷代海岸煎鹽之所元管九場

偽唐以為鹽監周顯德三年平江淮之後因之不

改焉鹽場九所在縣南北五十里至三十里俱

臨海岸五祐紫莊南八游北八游丁

溪竹子新興七惠四海

### 校勘

和州總序

左氏傳云吳取楚太子建之母于巢又云楚

子囊師于棠杜預云楚地和州蓋分為二邑



皆楚境

按左氏傳昭公二十三年吳取太子建之  
母于郢襄公十四年楚子囊師于棠據釋  
例所載則郢爲蔡地棠爲楚地皆闕其所  
在今記皆以爲和州之境又以郢爲巢未  
知本何書又按滁州總序亦引師于棠事  
云是今之六合六合蓋今揚州屬邑和滁  
二州南北正相接今記併引以序二州疑  
必有所據然不無舛誤

太平寰宇記卷之一百二十四終



程